

17 AUG 2000

Mahathir-Melayu

HAK KEISTIMEWAAN MELAYU AKAN TETAP DIPERTAHANKAN, KATA MAHATHIR

PUTRAJAYA, 17 Ogos (Bernama) -- Perdana Menteri Datuk Seri Dr Mahathir Mohamad hari ini berkata kerajaan tidak akan berganjak "walau satu langkahpun" dalam mempertahankan hak-hak keistimewaan orang Melayu di negara ini.

Beliau berkata semua kaum di Malaysia mempunyai hak untuk menyatakan pendapat mereka dan ini boleh dilakukan dalam majlis tertutup bagi mengelak daripada menyinggung perasaan kaum lain.

"Kerajaan tidak akan berundur walau satu langkahpun dalam mempertahankan orang Melayu kerana kita sedar mereka ini masih lemah," katanya di sini ketika berucap di hadapan kira-kira 500 orang yang mewakili 13 persatuan dan kumpulan yang menyerahkan kepada beliau satu memorandum supaya hak keistimewaan kaum Melayu dijaga.

Memorandum itu diserahkan oleh Presiden Angkatan Pemuda Warisan Malaysia (Pewaris) Anas Mustaffa.

Akhbar hari ini melaporkan bahawa beberapa persatuan Cina mengulangi pendirian mereka untuk memperjuangkan 17 tuntutan pilihan raya tahun lalu yang antara lain mendesak dimansuhkan perbezaan status Bumiputera dan bukan Bumiputera dalam semua bidang.

Dr Mahathir berkata beliau akan meneliti memorandum berkenaan dan berjanji akan mengambil tindakan sewajarnya.

Antara persatuan yang hadir pada majlis yang diadakan di Dataran Putra berdekatan Kompleks Jabatan Perdana Menteri itu ialah Majlis Profesional Melayu (MPM), Majlis Belia Malaysia (MBM), Persatuan Bekas Pelajar Maktab Rendah Sains Mara Malaysia (Ansara), Belia 4B dan Persatuan Kontraktor Melayu Malaysia.

Dr Mahathir berkata, beliau menyedari bahawa tuntutan supaya hak keistimewaan orang Melayu itu dilucutkan timbul setelah mereka berpecah dan menjadi lemah pada akhir-akhir ini.

"Seperti yang kita tahu pada masa akhir-akhir ini ternampak perpecahan di kalangan kita, dan juga ramai yang tahu bahawa kita berpecah, maka kita akan lemah. Apabila kita lemah, ada tuntutan supaya hak kita itu dilucutkan," kata beliau.

Oleh itu, katanya, amat penting supaya kerajaan yang diterajui oleh orang Melayu kini terus kuat dan tidak berpecah-belah supaya ia terus dapat mempertahankan hak orang Melayu.

Beliau juga berkata, kaum lain di negara ini amat beruntung kerana mempunyai pelbagai hak seperti boleh bertutur di dalam bahasa ibunda mereka dan mewujudkan sekolah sendiri.

Hak seperti itu, kata Dr Mahathir, kadang-kala tidak dinikmati oleh mereka walaupun tinggal di negara maju.

"Kita (Orang Melayu) tidak pernah mempertikai hak orang lain, oleh itu jangan ada mereka yang cuba-cuba untuk mempertikaikan hak kita," katanya, disambut oleh teriakan mereka yang hadir di Dataran Putra.

Dr Mahathir berkata, semua kaum perlu berjaga-jaga dalam mengeluarkan kenyataan kerana mereka mungkin beranggapan bahawa kenyataan itu tidak mendatangkan kesan terhadap mereka tetapi ia mempunyai implikasi kepada kaum yang lain.

"Semua kaum perlu berjaga-jaga apabila mengeluarkan kenyataan. Kita tidak mahu ia membangkitkan perasaan marah terhadap mana-mana kaum," katanya.

Beliau berkata, ramai orang Melayu yang telah berjaya pada hari ini telah menafikan pertolongan yang telah diberikan oleh kerajaan di dalam membina kejayaan mereka.

Tetapi kenyataannya, kata beliau, telah menunjukkan usahawan-usahawan

itu akan "jatuh tersungkur" jika mereka tidak menerima bantuan daripada kerajaan terutamanya ketika kegawatan ekonomi yang melanda negara baru-baru ini.

Katanya kerajaan telah menerima kecaman dari negara-negara luar kononnya ia mengamalkan kronisme dengan bertindak membantu usahawan-usahawan Melayu itu untuk berjaya di dalam bidang perniagaan.

Orang Melayu sebelum merdeka, kata Dr Mahathir, berada di kedudukan yang amat lemah dengan kebanyakannya tidak berpelajaran, tidak mempunyai sumber kewangan, senjata dan berpecah-pecah mengikut negeri mereka.

"Apabila terdapat ancaman kepada orang Melayu, mereka telah rapatkan barisan dan menentang bangsa besar itu (British) dan berjaya mengalahkan mereka yang mahu melucutkan hak kita di negeri kita sendiri," katanya.

Bertitik-tolak dari kejayaan itu, orang Melayu telah merapatkan barisan mereka sehingga berjaya melantik pemimpin sendiri untuk berjuang mendapatkan kemerdekaan bagi Tanah Melayu, kata beliau.

Beliau berkata, orang Melayu telah bermurah hati untuk sanggup menerima kaum yang lain sebagai warganegara dan tidak menindas sesiapa malah bersama-sama membina negara dan mengagihkan kekayaannya antara semua kaum dengan adil dan saksama.

Dr Mahathir berkata, perpaduan yang kuat di antara orang Melayu telah menjadikannya sebagai sebuah kuasa politik yang besar dalam negara tetapi ia tidak menyalahgunakannya untuk menindas sesiapa.

"Tetapi kita memperjuangkan keadilan untuk mereka mendapat tempat dan kedudukan pada rakyat, khususnya orang Melayu yang ketinggalan di dalam negara mereka sendiri," katanya.

-- BERNAMA

MHI ES NMO